

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB DR. HAJAH SITI MARIAH BINTI MAHMUD
[KOTA RAJA]
TARIKH : 18 JUN 2014
SOALAN :

YB Dr. Hajah Siti Mariah binti Mahmud [Kota Raja] minta **MENTERI KESIHATAN** menyatakan jumlah Doktor Pelatih di hospital-hospital KKM dan Universiti dan jumlah Doktor Pakar di hospital KKM dan Universiti yang terlibat didalam memberi latihan. Berapakah jumlah Doktor Pelatih yang tidak melengkapkan latihan mereka 5 tahun terakhir ini dan apakah faktor yang menjadi penyebabnya

Tuan Yang di-Pertua,

Saya memohon untuk menjawab pertanyaan ini secara bersekali bersama-sama dengan satu soalan lain yang menyentuh isu berkaitan doktor pelatih iaitu pertanyaan daripada YB Bukit Gantang bertarikh 19 Jun 2014.

Tuan Yang di-Pertua,

Sehingga 30 April 2014, terdapat 9,759 orang doktor pelatih di seluruh Malaysia yang sedang menjalani latihan siswazah di mana seramai 9,318 orang doktor pelatih telah ditempatkan di 39 buah Hospital Latihan Siswazah di bawah Kementerian Kesihatan Malaysia (KKM) manakala 441 doktor pelatih telah ditempatkan di 3 buah Hospital Universiti di bawah Kementerian Pelajaran Malaysia.

Secara amnya, seorang doktor pakar boleh menyelia 5 orang doktor pelatih dan penyeliaan adalah turut dibantu oleh pegawai perubatan *senior*. Sehingga 31 Januari 2014, terdapat 3,844 orang doktor pakar di Hospital-hospital KKM. Adalah dianggarkan bahawa jumlah doktor pakar di Hospital-hospital Universiti adalah seramai 1,400 orang.

KKM sentiasa mengemas kini dan memantau Program Pegawai Perubatan Siswazah (PPS) supaya dapat melahirkan tenaga doktor yang menepati kualiti yang ditetapkan. Mengikut perangkaan oleh Majlis Perubatan Malaysia, 95 peratus daripada PPS yang berada di posting ke lima telah berjaya menjalankan latihan dan diberi Perakuan Pendaftaran Penuh. Antara faktor penyebab Doktor Pelatih tidak berjaya melengkapkan latihan mereka adalah kerana pengambilan cuti yang panjang atas pelbagai sebab, ketidakhadiran tanpa cuti yang berkelulusan, tempoh latihan dilanjutkan atas pelbagai sebab dan sebagainya.